

Classe 606 – Set piece for Secondary students aged 15-18 years

Ma P'tite Rouoge-gorge par ALP

J'avons eune p'tite rouoge-gorge siez nous,
J'la dgette souvent aller et v'nîn
À san nid; muchi dans l'lierru,
Sus l'fôssé au bas d'not' gardîn.

S'ou la vèrrêtes! Coumme oulle est grôsse!
Mais vraiment ch'la n'mé ravit pas,
J'n'ai janmais veu tel appétit
Dans un ouaîsé - ou mange tout l'temps!

Ou veint dans l'bel en d'hors d'la porte,
Et pathaît saver l'heuthe des r'pas.
J'li mets des miettes sus l'auge d'la pompe,
Hors dé la vaie des cats et tchians.

Pépée dit qu'ch'est eune affrontée -
Ou n'la tchitte pas s'il est à foui -
Et qu's'ou mange touos les vèrs qu'ou happe,
Ch'est bein seux qu'ou s'en va mouothi.

Pépée n'sait dgéthe ou'est qu'tout ch'la va!
Mais j'sai bein, mé; j'ai découvèrt!
J'èpyie dans l'nid et j'vis les p'tits
Tch'attendaient là, lé bé ouvèrt!

Les préchains jours j'espéthe dé vaie,
Jutchis sus l'no à l'heuthe des r'pas:
Bav'thettes èrlisantes au solé -
Ma p'tite rouoge-gorge, et ses êfants!

Go to the [Learn Jèrriais website](http://www.learnjerriais.org) to find the audio version of this... www.learnjerriais.org



Jèrriais